



Selasa, 26 April 2022

Ogen: 1 Tesalonika 5: 17-18



Ertoto Katawari Paksa Pe



Ertotolah katawari pe! Nuriken maka ertoto e la lit batasen jamna. katawari pe ertina rusur, lalap, segedang wari. Adi bage katawari kita erdahin, adi segedang wari ertoto? Perlu si ertiken maka ertoto e labo terjeng tupung kita ercakup-cakup ras Tuhan, labo terjeng tupung kita nuri-nuri kerna keluh kesahta, entah tupung kita nuriken keperlunta. Toto e me ngelakoken kai si itotoken kita. Umpamana, i bas pertoton Tuhan si belasken '*jadilah min peratenNdu i doni enda bagi ni surga.*' Cukup kin e terjeng sipindoken saja? Dua seh telu kali seminggu enda si pindoken man Tuhan. enggo dage jadi bagi sitotoken kita e i bas doni e? Kepeken, kita lebe ngelakoken kai si pindo e. Uga carana? Kita lebe ngelakoken si bagi isuraken Tuhan: nggeluh bujur, mehuli, tanggungjawab i bas erdahin, transparansi, nggit ngalemi, siergan ras sidebanna. Adi kerina kita si mindo ndai bagenda ka pengelakokenta, la kin akapndu jadi nge kerajan Dibata i doni enda? Tupung kita ngelakoken si mehuli e, em pertotonta. Jadi, adi kataken ertoto katawari pe, erbahan si mehuli katawari pe. Enda sada contoh ku bas pertoton Tuhan. Adi umpamana kita ertoto mindo kesehaten, kai dage si bahan? Tentu kita pe njagai kesehatenta alu man teratur, pangan si sehat, olahraga teratur, istirahat pe ratur kenca e atur ka cara rukur. Jadi sendalanan pemindonta ras perbahanennta. Jadi, ertotolah katawari pe ertina tuduhkan si ipindonda man Dibata e arah perbahanen. Kai sipindo e kita pe ngelakokensa. Bage me pengajaren Paulus man perpulungen Tesalonika gelah segedang geluh perpulungen e ertoto. Encidahken perbahanen si mehuli dengen lalap ngatakan bujur man Tuhan. Adi silakoken bage, kita pe enggo igelari kalak si ertoto. Malem me ateta nggeluh adi tutus kita i bas ertoto.